

Ebbaluṅa endaayi eyi Pawulo gaṅandiihira Temuseewo Enyanjula

Pawulo nj'owayinandiihira *Temuseewo* omuloobera wuwe ebbaluṅa yino, endaayi. Abahugu mu by'Ebbayibbuli bajeega baati gayinandiiha ṅagati w'omwaha gw'enkaaga n'ebiri n'enkaaga neene oluvanyuma lw'ohusaaliwa hwa Kurisito. Pawulo gaali anjira Temuseewo ng'omwana wuwe (Bef 2:22; 1 Tem 1:2; 1:18).

Yino ndala hu bbaluṅa ene eji Pawulo gaṅandiihira abaatu mu hifo hy'ehibbubbu. Abaatu abo baali nje Temuseewo ni Tito ko ni Filimooni. Mu bbbaluṅa yino, mulimo bingi eby'ohulaabbira abafugiirira Kurisito ebiṅamba hu hujumirya Hatonda (2:1-15), abatangirisi babafugiirira Kurisito (3:1-13), hu basomesa ab'obudulingi (1:3-11; 4:1-5; 6:2-5). Hino hiranga engeri eyi Pawulo gaali n'asomesamo Temuseewo ohuba omutangirisi omulaṅi ow'abafugiirira Kurisito. Era mu bbaluṅa yino husaṅanamo ebiitu bingi ebiṅamba hu ngeri ey'ohutangiriramo abafugiirira Kurisito.

Ebiri mu bbaluṅa yino mu buupi

1. Pawulo aheesa Temuseewo (1:1-2)
2. Ohulabula hu biṅamba hu basomesa b'obudulingi (1:3-11)
3. Pawulo geyaasa Yesu Kurisito (1:12-19)

4. Pawulo alaabbira Temuseewo hu binjamba hu batangirisi babafugiirira Kurisito n'ohujumirya Hatonda (2-3).
5. Engohoba (4-6)

Obuheese

¹ Ndiise Pawulo owafuuha omuhwenda wa Yesu Kurisito olw'obujangi wa Hatonda era Omunonjosi weefe njalala ni Yesu Kurisito oyu hulimo owesige.

² Kuñandiihira ewe Temuseewo, oyu pira ng'omwana wange omwene n'omwene olw'ohufugiirira ohu ese ni neewe huli ni nahwo mu Kurisito. Hatonda Seefe ni Yesu Kurisito Musengwa weefe bahunjambire ehisasabirisi era bahuje emiyaaya.

Ohulabula hu basomesa ababbaamya

³ Ng'olu nahuloma ni n'ali ni tiina e Makedoniya, nenda osigale mu Efeeso, olagire abaatu abali husomesa ebibono eby'obudulingi ebyabuhana n'ohufugiirira hwefe, bahyagamy.

⁴ Balagire balehere anjo ohuheneranga ebiseera mu husomesa abaatu ni batambisa engano ejitali tuufu ejinjamba hu byafaayo by'obusaale n'ohulanduluhana n'olwanji lw'amasiina g'abaahale olutahoma. Ebyo byongesa huhubba mbaha n'ohunjahana mu baatu, mu hifo hy'ohubasomesa ebya Hatonda. Ebya Hatonda hubyoheresa ni hubita mu humufugiirira.

⁵ Ehingendererwa mu huhunja ehiragiho hino, hya hwenda huhubbirisa abafugiirira bendane

n'ohwenda ohuŋwa mugati w'omwoyo ogubulamo kirihindi era oguŋanga ohwawula ehirani n'ehibi. Singa bendana mu sambo eyo, hiija hulaga ng'olu bagumisye esomesa etuufu. ⁶ Balala hu baatu abo abasomesa ebitali bituufu, ebyo babinwaho, baagobola hu binambulamo. ⁷ Abaatu abo benda basomesa abaatu amagambi ga Hatonda aga abeene batategeera wayire beenjira baati bagafaania.

⁸ Hwesihwesi humanyire huuti ebi magambi ga Hatonda galoma birani ate bisaana, omuutu anagatambisa mu ngeri etuufu. ⁹ Ne husaana hutegeere huuti amagambi sibagataŋo hu lw'abalani, aye hu lw'abaatu abajeemu abahola ebibi, abaganiye mu hubbenga ni batatya Hatonda, abaali n'omwoyo omubi era abatala Hatonda. Abeeti, abeeta abasaawe oba abanyinaawe ko n'abaatu abandi. ¹⁰ Abahwedi, abasinde abanenyuha n'abasinde bahyawe, abatunda mu bahyawe. Abadulingi n'abalayira ebitali bituufu, n'ebindi byosibyosi ebitolana n'esomesa etuufu ¹¹ enjambagana n'Amanjulo Amalani aganamba hu Hatonda oyu huŋa enono, aga bapambya ohulomera abaatu.

Ohweyaasa Hatonda olw'ehyere hihye

¹² Neyaasa Yesu Kurisito Musengwa weefe, owambona ni ndi mwesigwa ohuhola omulimo gugwe ko gagupambya gaahena gaapa n'amaani agohumunjeeresa. ¹³ Wayire oludaayi namulomangaho ebibi, ni ngudya abamufugirira, era ni ndi muutu w'embaha, gaasaasira olwohuba ebyo byosibyosi nabiholanga mu

buṅaayi, n’olwohuba ti naali kiiri humufugiirira.

¹⁴ Aye Musengwa weefe gapambira ehisasabirisi ehyene ehingi, era gaapa n’omwoyo ogw’ohufugiirira ṅalala n’ohwenda ebi husuna ohuṅwa eyiri Kurisito.

¹⁵ Ng’olu omanyire, efe abafugiirira huloma hituufu huuti, “Yesu Kurisito gaaja hu hyalo ohunoṅola abali n’ebibi.” Ehibono hino hituufu hyene ehi hiisi muutu asaniye ohufugiirira, era nga mu baatu abo ababi ndiise owaali ni kira ohuba omubi.

¹⁶ Aye wayire naali mubi ohwola aṅo, Hatonda gaapambira ehisasabirisi. Ese owaali ni singira erala ohuba omubi. Gaasoniṅa olw’ohwenda ohulaga abaatu ng’olu Yesu Kurisito asobola ohugumikiriza abo abanṅa ohumufugiirira, basobole ohusuna obulamu obutanṅaṅo.

¹⁷ Ale ṅaahani, hiisi muutu aṅe Hatonda eṅono olwohuba nje Habaha aṅuga emirembe n’emirembe, atalifa, oyu muutu atasobola hubona n’emoni era nga nje Hatonda omulala yeṅene emirembe n’emirembe. Amiina.

¹⁸ Temuseewo mwana wase, kuhubirisa ohuhola ebyo ebyolana n’ebibono eby’obunaabbi ebi bahulomaho baati olihola, konyo osobole ohugumikiriza ohuhola omulimo gwa Hatonda n’ohusoola olutalo n’obusira.

¹⁹ Yegumye ohufugiirira era n’ohola ehi omanyire ti nj’ehituufu. Abandi hino bahiṅwaho hale, hyabaleetera ohugwa. ²⁰ Mu abo p’omuli Himenaayo n’Alekezanda aba

nalyoŋera Sitaani abatambise hiisi ehi anende baheega ohutafodogolanga Hatonda.

2

Ohujumirya

¹ Ohusookera erala, olw'ebyo ebi kenire ohuhuloma, kuhubbirisa ewe ko n'abafugiirira bosibosi ohusabirangaho abaatu abandi hiisi olu munahumbaanenga ohujumirya Hatonda. Mubasabire, Hatonda asobole ohubayeeda benenye, banoŋohe. Era ni muba ni musaba, mweyaasenga Hatonda hulwa ebi aholire. ² Musabirenga habaha, n'abanugi abandi abasigaayeyo ko hunjange ohuba obulaji, ni huli n'edembe eryohujumirya Hatonda n'ohuhola omulimo gugwe ni njabula atuhubba hu muhono. ³ Hino hiraŋi era hisangaasa Hatonda Omunoŋosi weefe, ⁴ owenda abaatu bosibosi banoŋohe, era basobole ohufaania amazima. ⁵ Hiri hiityo olwohuba Hatonda ali mulala, era nafaanania abaatu ni Hatonda, ali mulala. Omuutu oyo nje Yesu Kurisito, ⁶ oweenayo abe endiŋi y'abaatu bosibosi. Buno nj'obuhwenda obu Hatonda gatunambya era nga hino nj'ehiseera ehituufu ehy'ohubulomera abaatu. ⁷ Era ehyo nj'ehyagira Hatonda gaatuma ohuba omuhwenda nje nangirire era somese Abatali Bayudaaya obuhwenda buwe obutuufu buno. Ehi ndoma nj'amazima, sindulinga.*

⁸ Olw'ehyo, hiisi olu munahumbaanenga ohusaba, nenda abasinde ni banagololenga emihono

* 2:7 2:7: 2 Tem 1:11

jaawe, baholenga baatyo ni babula tima oba egongi hu muutu.

⁹ Era nenda abahasi bambalenga mu ngeri etanjemula era ebyambalo byawe bibawiihenga bulaji ni bitaleetera abasinde ohubegomba. Bataholanga majolobera mu fiiri jaawe wayire ohwambala embira n'emihobyo eby'omuṅendo, wayire ebyambalo eby'ebbeeyi ehibitiriiye.* ¹⁰ Cooka ebiseera byawe n'ebbeesa babihenerenga hu huhola ebiitu ebiyeeda abaatu olwohuba ehyo c'ehi Hatonda genda abahasi ohuhola, ko weeyite abo abaloma baati bamufugiirira.

¹¹ Mu hiseera hy'ohusomesa Ebyanjandihiwa, omuhasi gegenga maṅoleeye, ni geṅomehire. ¹² Sifugiirira muhasi husomesa oba ohuba n'obunangi hu musinde, aye asaana huṅoleera huṅoleera. ¹³ Hiri hiityo olwohuba ti Adamu nj'oyu basooka ohuwumba, nga ko baloosaho Kaawa.* ¹⁴ N'ehindi, Adamu sinje oyu Sitaani gadulinga, aye omuhasi nj'oyu badulinga, gagwa mu hibi. Olw'ehyo abahasi bali n'ohwenomeha.* ¹⁵ Aye Hatonda alinonola abahasi singa banegumyenga ohumwenda n'ohumugondera, ohwesiganga Kurisito, ohwoheresanga obuvunanyiziwa waawe ng'abasaaye, ko n'ohwebisya mu ngeri esaanira.

3

Abalabirizi b'ehibbubbu hy'abafugiirira

* **2:9** 2:9: 1 Peet 3:3 * **2:13** 2:13: Tand 2:7,21-22 * **2:14** 2:14: Tand 3:1-6

Kurisito

¹ Ng'olu omanyire, efe abafugiirira Yesu huloma hituufu huuti, "Omuutu yeesi owenda omulimo gw'obulabirizi w'abaatu abafugiirira Yesu aba gegombire ohuhola omulimo omulani."

² Olw'ehyo, Omulabirizi, aseene ohuba omuutu ow'esambo endani ejibulaho ehi omuutu genjambya. Ali n'ohuba omusinde ow'omuhasi mulala, afuga owongo, omwegenderesa, oyu baatu bana enono, asangaalira abageni, amanyire ohusomesa, ³ atali mumeesi, atali muhambwe aye n'anamba ebiitu pola, ataduhanaduhana, era anjuma mulungo gw'ebbeesa. ⁴ Ali n'ohuba muutu anjuga bulani amago gage, n'abaana babe ni bamunjulira era ni bali b'esambo ndani. ⁵ Kale omuutu atanjanga hunjuga mago gage ameene dala, aba anjanga atye ohulabirira ehibbubbu hy'abafugiirira Kurisito? ⁶ Nehindi, sihirani Omulabirizi gaaba omuutu owahafugiiriranga Kurisito, olwohuba omuutu hy'oyo ahanda geehudumbasa, ehyo hyamuleetera ohumusalira omusango, ng'olu basalira Sitaani. ⁷ Asaana ohuba omuutu oyu abaatu abatafugiirira Kurisito bosibosi bana enono. Olwohuba anabula ehyo, baaja humulomaho ebibi atanjanga hulomeranga abaatu ehibono hya Hatonda bamunjulira, ate hino nj'ehi Sitaani genda.*

Abadiikoni

⁸ Mu ngeri nj'enyene, Abadiikoni boosi basaana ohuba abaatu aba bana enono, abaloma

* 3:7 3:7: Tit 1:6-9

amazima, abatehapira mwenge, era abanjuma mulungo gw'ebbeesa. ⁹ Bateehwa ohufugiirira obuhwenda obunamba hu Kurisito. Hino bali n'ohuhihola n'obulamu waawe wosiwosi. ¹⁰ Era ni bahiiri hubangala ohubana obujeeresa bunu, beheererenga babahebera babona hanye bananga ohuhola bulani obujeeresa bunu ni nanjuma hya hubenjambya. ¹¹ Mu ngeri nj'enyene, abahasi baawe* boosi baatyo, bateehwa ohuba abahasi aba baatu bana enono, abatanayirisa aye abegenderesa mu hiisi ehi bahola era abesigwa mu hiisi hiitu.

¹² Mu bufumbo, Omudiikoni ali n'ohuba omusinde w'omuhasi mulala, era n'ananga ohunuga obulani abaana babe, n'amago gage, ¹³ olwohuba abaatu abajeeresa obulani ng'abadiikoni, mbaba abaatu bana enono era n'abeene boosi baba n'obugumu ow'ohulomera abaatu ebihya hu hufugiirira Yesu Kurisito.

Ehyama ehihulu

¹⁴ Wayire nga suubira ohuuja mangu eyi oli, kunandiihira bino olw'esonga ti, ¹⁵ singa nabanjo ehindwihise ohuuja, obeenjo n'omanyire eby'ohusomesa abaatu bamanye ng'olu Hatonda genda abaatu baholagane hy'abaana abomu nyumba endala, era nga bo nj'abaatu† ba Hatonda Omulamu era esiiro eyi ohufugiirira obuhwenda wa Kurisito obulani era obutuufu, bwediye. ¹⁶ Ananjuma hubuusabuusa, Hatonda

* **3:11** 3:11 Oba abadiikoni abahasi. † **3:15** 3:15 Oba ehibbubbu hy'abafugiirira Kurisito.

gaatuwihulira ehyama ehiri mu hufugiirira
Kurisito ehiroma hiiti:

“Hatonda geebonesa eyi huli ni gambaaye omu-
biri hy’omuutu,

Omwoyo wa Hatonda ng’ahahasa ebiga-
holanga.

Abamalayika baamubona,

Hatonda ng’amunjira mwigulu mu njono
ery’amaani.

Abafugiirira nga balomera abamawanga
ebimunjambaho,

Ng’abaatu bamufugiirira.”

4

Abasomesa ebitali bituufu

¹ Omwoyo Omutukuvu atulomera buhomya
ati mu ndaalo ej’oluvanyuma njalibaano
abalinjwa hu hufugiirira Hatonda, babbaamira
hu baatu abasomesa ebitali bituufu ebinjwa eyiri
Sitaani n’emyoyo ejibbaamya. ² Abasomesa

abo balyeranga ohuba ti basomesa bituufu
ate nga budulingi wereere. Baliba egubbe,
abamalimbe natanjulira, ni batafaayo oba
ebi basomesa bituufu oba byabudulingi.

³ Baligaana abaatu ohuhwa n’ohufumbirwa,
era njalino n’ebiryo ebi baligaana abaatu
ohulya ni babiranga by’embiho ate nga hiisi
hiitu Hatonda gahitereeyeno abafugiirira era
abafaania amazima bahitambise ni bamweyaasa
olw’ohuhibanja. ⁴ Olw’ehyo, hiisi hiitu ehi

Hatonda gatonda hiraŋi, era njanuma hisira,
kasita omuutu geyaasa Hatonda ko gahitambisa,

5 olwohuba ebiitu byosibyosi bifuuha biranji olw'ehibono hya Hatonda n'olwohubisabira.

Omujjeeresa omulani owa Kurisito

6 N'onalomereenga aboluganda ebibono bino ebi kuloma, onaabenga mujeeresa omulani owa Yesu Kurisito, era Hatonda aja huhungangasa mu hufugiirira nomu bujeeresa n'abita mu bibono ebituufu ebi waafugiirira.

7 Wenjale emboosi ejehinjere ejibula mahulu ate ejitanooma n'ohunjaya. Aye wenaseho esambo ey'ohuhola ebi Hatonda genda. 8

Hola hino olwohuba ng'olu olulomo luli, "Hiranji omuutu ohunasa omubiri gugwe ohutamba n'amaani olwohuba hino himuyeeda naali mu bulamu wuhu hyalo huno. Cooka ehisinga obulani hwenasaho ohuhola ebi Hatonda genda olwohuba hino himuyeeda n'ahiiri mu bulamu womu hyalo hino ko n'obulamu obu husuubira ni hunooye mu hyalo hino."

9 Ehibono ehyo hituufu olwohuba esubi ly'efe, abafugiirira liri mu Hatonda era hiisi muutu gaahali ahifugiirira anabula hwemoota. 10 Hino nj'ehigira ni hufaabiina ohubona ti huhola ebi genda, olwohuba Ye Mulamu era nj'Omunojosi w'abaatu bosibosi, ko weeyite abafugiirira Kurisito. 11 Ebi kuloma bino, bisomesenga abaatu era balagire ohubyoheresanga.

12 Otaganya baatu huhubisyamo emoni olwohuba ti mbo ohiiri mujere. Ng'olu hiri ti omujere ahubba enoma omuhulu gaahina, weesi fuuha ehy'ohuboneraho eyiri abafugiirira mu malomere, mu sambo eyi

webisyamo, mu hwenda ohu wendamo hiisi muutu, mu hufugiirira huhwo nomu bugwalaafu. ¹³ Yeegumye ohusomeranga abaatu Ebyañandihiwa, n’ohubabuulira n’ohubasomesa ebya Hatonda, ohwola olu ndiija. ¹⁴ Otagayalira hutambisanga ehirabo ehi Hatonda gahuṅa olu abatangirisi babafugiirira Kurisito bahufuujaho amate bahwabula baahena bahusabira olu bahutaho engalo.

¹⁵ Omanyanya otademba huhola ebi kuloma bino, era bitengeho omwoyo, abaatu bosibosi babone ng’olu weegumisye ohugendera mu magira ga Hatonda. ¹⁶ Bona ti weegumya ohugonderanga Hatonda mu hiisi hiitu n’ohusomesanga ebimuṅambaho ebituufu, olwohuba n’onaholenga otyo, Hatonda alihunonjola ewe ko n’abahutegera ohutwi n’osomesa.

5

Obuvunanyiziwa bw’abafugiirira eyiri abaatu bahyawe

¹ Omusinde ahahiraho emyaha otamuhayulanga, aye muṅooyingenga n’omulabula ng’olu wahaholire lataawo. Abavubuka ab’oluse lulwo banirenga hy’abalebe babo, ² abahasi bahulu n’obanjira ohuba hy’abamaawo, ate abahasi abahiiri abanjere n’obanjira hy’ababoojo babo aba otanjanga husobya ni nabo.

³ Njanga abanamwandu abanjuma abanjambire hu muhono, obuyeedi. ⁴ Aye namwandu anaba n’abaana oba abejuhulu, abo babenga nj’abamulabirira olwohuba obuvunanyiziwa

obu hiisi afugiiririra Kurisito ali n’ohwega ohwoheresanga, nj’ohumanya ohulabirira abomu mago gaawe, n’asasula abasaaye babe ebi bamuholera, olwohuba ehyo hisangaasa Hatonda.

⁵ Namwandu oyu muteehwa ohuyeeda nj’oyo abuliriraho muutu yeesi amuyeeda, oyu su-ubi lirye liri yiri Hatonda yenene era asi-iba omuusi n’owiire ni gejunderera Hatonda amuyeede. ⁶ Aye namwandu aba mu hwetoly-onga n’ohwesangaasa omwene ndamanya Hatonda, wayire ng’aba ahiiri mulamu mu bulamu ow’omwoyo aba hy’omufu.

⁷ Laabbira era olagire abaatu baholenga baatyo natabaño kadi mulala abaho ehy’ohumunanya. ⁸ Singa nabaano atafaayo huyeeda abalebe babe, ko weyite abomu mago gage abeene, aba gegeene ohufugiirira, era aba mubi ohuhiraho n’atafugiirira Hatonda.

⁹ Namwandu ahiiri hujesa emyaha nkaaga, otamuñandiihanga hu lukalala lw’abanamwandu abohuņa obuyeedi. Omuutu oyu onañandiihenga nga namwandu ali n’ohuba ni gaali mwesigwa eyiri wamwe,* ¹⁰ era oyu baatu bamanyire baati muutu mulani, owahusa abaana babe bulani, owasangaaliranga abageni mu mago gage, owalihitanga abaatu ba Hatonda ni goola n’ohubooga amagulu, owayeedanga abaalinga mu bigosi, era owenangayo ohuholera abaatu ebirani ebya buli ngeri.

* **5:9** 5:9 Oba owaali n’atebira piki n’abasinde abandi.

11 Aye abanamwandu abahisaaba ni gateremuha otabanandiihanga hu lukalala lw'abanamwandu, olwohuba ehy'ohubeeramo aṅo ni babula musinde ni hiribahayisa, balibbwaga endagaano ey'ohwenayo eyiri Kurisito, baaja bafumbirwa. 12 Ehyo hiribasalira omusango ogw'ohutagumya ehi basuubisa ohuhola oludaayi. 13 N'ehindi, abanamwandu hy'abo batera ohulera engalo n'ohuhena ebiseera byawe ni balerenga mu bidaala by'abaatu. Sicehyo hyonyene, aye bali ni kalebule era beeyingisa mu bitabanambaho, ni berebula n'ebibatasana huloma. 14 Ehyo nj'ehigira nahendire abanamwandu abahisaaba ni gateremuha bafumbirwenga, basaale abaana, era balabirire amago gaawe, batanṅa Sitaani ngira ey'ohutulomesaho ebibi. 15 Abanamwandu abandi bahena hale ohugota, balonda Sitaani.

16 Aye singa ṅanabengaṅo omuhasi afugiirira Kurisito n'ali n'abanamwandu mu lulyo lulwe, abalabirirenga hiteeyuseho obusito hu hibbubbu hy'abafugiirira Kurisito, ko hisobole ohulabiriranga abanamwandu abanjumaho ababayeeda.

17 Abatangirisi abatangirira obulanṅi ehubbubbu hy'abafugiirira, mubanenga enono n'ebibemeeresanṅo mu bujeeresa, ko weeyite abo ababuulira n'abasomesa abaatu ehibono hya Hatonda, 18 olwohuba Ebyanandiihiwa biroma biiti, "Otasidihanga munwa gw'esaame ni yirima, wayirobeerese ohwaya." Era bimeedahṅo biiti, "Omutambi asaanira epeera

yiye.”*

¹⁹ Otangujirisanga hwihirisa ebi baba ni basidiha hu mutangirisi yesiyesi, ohutusaho n’aliho abamulumirisa babiri oba badatu.* ²⁰ Aye abanjeeresa ababbenga, bahayulirenga mu lwi-juuye, abandi ko batye. ²¹ Mu ga Hatonda Seefe ni Yesu Kurisito ko n’abamalayika babe abatubona ebi huhola, kulagira ohuholanga ebi kulabbiiye ananuma hwehubbira, wayire ohusalirisa. ²² Otangujirisanga hwisa hu baatu emihono jijo ohubaabula ohuba abatangirisi b’ehibbubbu hy’abafugiirira Kurisito, olwohuba ehyo hihanda hyahwingisa mu bibi bya baatu abandi. Yehuume osigale n’oli mugwalaafu. ²³ Aye ehyo hitahuleetera hunywanga amaaji goonene. Nywangaho n’otwenge tutotono tuhuyeede mu bulumi womu hida hiho n’ohulwalalwala huhwo.

²⁴ Ebibi by’abaatu abandi biba byanjalafu era mbibibasingisa omusango, aye eby’abandi biba mu ngiso era biboneha luvanyuma. ²⁵ Mu ngeri nj’enyene ebikolwa ebiranj biboneherera. N’ebibi byosi biityo pobiri. Olw’ehyo otangujirisanga hwawula abaatu.

6

Abeedu n’abasengwa baawe

¹ Abafugiirira Kurisito bosibosi aba bataayeho ehijoogi hy’owiidu banjenga abasengwa baawe enono ery’amaani olwohuba hino hiija hunjeesa

* 5:18 5:18 Mag 25:4; Luk 10:7 * 5:19 5:19; Mag 17:6; 19:15

Hatonda enono n’ohufugiirira hwefe batahufodogola. ² Ate abeedu abali n’abasengwa baawe abafugiirira Kurisito, batanzeeganga baati olwohuba abasengwa baawe balebe baawe mu hufugiirira, bananga ohubabisyamo emoni. Aye babanzeeresenga bulanji n’ohuhiraho, olwohuba abaganyulwamo, bafugiirira bahyawe era abahoda eyi bali. Ebibono bino ebi kuloma, bisomesenga abafugiirira Kurisito era bahubbirise babiholenga.

Omulungo gw’ebbeesa

³ Omuutu yesiyesi asomesa ebibono ebindi ebitanzebagana n’ebibono ebituufu ebiroma hu Musengwa weefe Yesu Kurisito n’esomesa yiye, ebinanga ohuyeeda omuutu geebisya mu ngeri esangaasa Hatonda, ⁴ aba geebona era ni geranga omumanyi cooka nga mu butuufu saategeera ebi asomesa. Omuutu oyo anyumirwa bugali ohunahana hu binamba hu mahulu g’ebyanzeandiihiwa era aba hy’omugwa eralu. Hino himusaalira omwoyo ogw’ekirihindi, ekayu, ohunaha abahye esiro, n’ohunzeega ati bamulimirira. ⁵ Hino himunjeramo ohubererera n’anjirinana n’abahye abamufaanana, boosi abanzeoye hu mazima, abanzeega baati ohuhola ebya Hatonda, ngira eyoosa omuutu hu busuni. ⁶ Aye mu hwesiga Hatonda n’ohutanjuduha ehi osunire, pomuli amagoba agasinga. ⁷ Olwohuba njanuma ehi hwajire ni nahyo mu hyalo, era njanuma ehi hulitiina ni nahyo ni huhinjwamo. ⁸ Hutabanga n’omwoyo ogw’omuhopo. Ni

hunabenga n'ebiryo ebituhena n'ebyambalo ebi hwetaaga, ebyo bituhenenga. ⁹ Aye hyangu abaatu abayayaanira eby'obujinda ohuhemewa, baagwa mu lutuula lwa Sitaani batandiha ohuhola ebitoola ebiiniha abaatu mu hugota n'ohusihiiriha, ¹⁰ Olwohuba omulungo gw'ebbeesa nj'esimuho y'ebibi ebya hiisi ngeri. Olw'omulungo ogwo, abaatu abandi bagotire baanwa mu hufugiirira, nga bereetaho obulumi oweene obungi mu myoyo jaawe.

Ohulabula hwa Pawulo eyiri Temuseewo

¹¹ Aye ewe omuutu wa Hatonda, yenjalenga ebyo byosibyosi. Genderanga mu bugwalaafu n'ohola ebi Hatonda genda, n'omwesiga, ni wenda abaatu bosibosi, n'ogumira ebigosi, era n'onjamba ebiitu pola. ¹² Ohufaanana hy'omusooli mu lutalo, weesi njirinananga ni Sitaani n'obuhenereri ni wesigire Hatonda ko osobole ohusuna obulamu obutanwanjo obu gahulangira hu ludaalo olu waatuliraho lubona ohufugiirira huhwo mu moni j'abangi.

¹³ Hatonda aya hiisi hiitu obulamu ni Yesu Kurisito owalomera erala amazima mu moni ja Pootiyo Pilaato, nga nj'abajulizi beefe hwembi, kulagira ¹⁴ oholenga hiisi ehi Hatonda genda ohole, ohwolera erala olu Musengwa weefe Yesu Kurisito aligobola. ¹⁵ Hatonda oyu hujumirya ate nga nje yenene anuga mu mazima, Habaha w'abahabaha era Musengwa y'abasengwa bosibosi, omwene nj'aligobosa Kurisito hu hyalo mu hiseera hiye ehiragaane. ¹⁶ Hatonda yenene ali n'obujangi era atafa, owihala mu njase

ey'amaani eyiitamo emoni, oyu ŋabula owaali n'amuweeneho era nga ŋaŋuma aŋanga ohu-mubona, omwene oyo abe nj'aŋuga era hiisi muutu amuŋe eŋono emirembe n'emirembe. Amiina.

Ohulabula eyiri abaninda

¹⁷ Labula abaninda abali eyo balehere aŋo ohweŋeegaho wayire ohwesiga obuŋinda ate nga sibubererera. Beesigenga nje Hatonda atuŋa byosibyosi ebitugasa. ¹⁸ Balome baholenga ebirani, babe baninda b'ebirani ebi baholera abahyawe, era babe bahyere ate abagabi. ¹⁹ Ni banaholenga baatyō baja huba hy'abebiihira obuŋinda mwigulu, era banaabenga bebbotera omusingi omugumu ohu balyema basuna obulamu obutaliŋwaŋo.

²⁰ Temuseewo, huuma bulani obunjeeresa obu bahuŋambya. Oteyingisanga mu huhubba embaha mu by'obusirusiru ebitaŋeesa Hatonda eŋono ebi baatu abandi beedulinga baati mbo nj'amagesi. ²¹ Abaatu abandi bagotire baanwa hu hufugiirira banamba esomesa eyo ebbaamya. Ale mwesimwesi, Hatonda abanje ekabi.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff